



簡齋先生文選目錄

曲周劉榮嗣敬仲甫著

疏

恭謝天恩疏

恭謁二陵閱視河道疏

疏

決工告成疏

建義告成欽賞謝恩疏

覆勘

黃河疏

報回空過濟禁私載疏

請協濟大

挑錢糧疏

流寇逼近鳳陽疏

責成司道理

河護運疏

護陵督漕疏

微臣治河無能疏

挽黃泊泐耽延重運實陳疏

挽黃已成堤

工應築等疏 謝恩疏

書

答康念東 與姚現聞太史 與張恒山 答

韓求仲修撰 與袁滄孺 答吳師海 答南

二太 答張金銘 答楊寨雲年丈 答王肖

乾中丞 答徐瞻愚吏部 與周敬松家宰

答趙儕鶴家宰 與張蓬玄撫臺 與左滄嶼

侍御 與張誠宇家宰 與唐毅知公祖 答

周冲白光祿 與李河臺 又與李河臺 與

白華池銓部 與趙少司馬 與山東撫臺

與李河臺 答郭墨千大司農 與撫臺 與

成苾予老師 與成老師 與張蓬玄老師

與劉幼孫侍御 與呂豫石吏部 與濟南守

與畢崧高侍御 與李懋明總憲 答朱咏

白太守 與方孩未直指 答范質公銓部

答耿孟諸銓部 與姚現聞太史 與左滄嶼

直指 與鄒南皋總憲 與張蓬玄中丞 答

徐瞻愚 與成苾予老師 與徐瞻 與徐明

衡 與成老師 答練任鴻侍御 答盧德水

戶部 與魏廓園給諫 與練任鴻侍御 與

王中虛金吾 與賈孔瀾 與張恒山 答劉

虞亭刺史 與薛千仞 與成恣予老師 與

侯木菴年兄 與侯六真年兄 與盧德水

答丁光三公祖 與岳霞標 與耿樸公年兄

與侯六真年兄 與侯木菴年兄 與劉秦

望給諫 與瞿稼軒給諫 與李布宸銓部

答耿孟諸吏部 與瞿稼軒給諫 與姚孟長

太史 與范質公 與張念堂金吾 與盧德

水 與方孩未侍御 與倪鴻寶太史 答聶

淡心 與禹海若漕臺 與成老師 與文湛

持太史 與何芝嶽相國 與陳睂公 與錢

抑之揆輔 答盧九台兵憲 與范質公大司

馬 與吳龍尾侍御 與路皓月侍御 答王

伊愚兵憲 與楊崑岑總漕 與姚現聞太史

與劉胤平太史 與楊崑岑漕撫 與天津

賀中冷巡撫 答薛千仞 與湯叅予學道

與丁光三巡撫 答周司李 答藍田叔 與

張湛虛大理 與盧德水 答陳睂公 答成

老師 與王覺斯太史 與陳睂公 與董玄

宰宗伯 賀范質公總憲 與陳石泓司寇

答張念堂大金吾 與成老師 答魏仲雪年

兄 與戈莊樂 與聶澹心 與陳石泓大司

寇 與路皓月侍御 與侯六真大司農 與

濟南楊別駕 答陳幼白兵憲 與倪鴻寶官

詹 與路皓月侍御 與侯六真大司農 與

張恒山 與張見立漕道 與劉心盤大司空

答程芸閣倉場 與張見立漕道 與范質

公大司馬 答呂初陽 與范質公大司馬

與鹿乾嶽 與劉同人 與路皓月侍御 與

范質公大司馬 與某公書

序

保定巡撫蓬玄張老師序 送趙芝庭邑父母

序 王劬慕先生奏最序 大金吾張更生七

十序 張太翁九十序 少岡卿米仲詔先生

序 聶澹心詩序 吳于遶詩序 王亦房詩
序 南滁漫稿 送盧雨若詩序 寧澹齋全
集序 鏡林制義小引 宋安雅制義序 曹
稚子三試草序 張爰平四書稿序 五言律
祖引 杜詩胥鈔序 宋元類書序 王劬慕
先生諸子纂序

論

自任天下之重論

記

帝咨樓記 陞任邑侯王夫子均修記 曲周
縣重修儒學記 西山紀遊 寧波守蔡生祠
碑記

題跋

跋趙芝庭家藏思白冊 跋邢子愿行書卷 書
何士抑類銘後 題王太史書卷 題邢子愿
草帖後 賈獻仲寧我篇跋 題王公世德作
求冊

祭文

奠張太夫人文 祭楊太翁文 祭盧太夫人

文

議

荒政議

備荒五條
救荒五條

兵事議

墓誌銘

明賜進士太常寺華池白公墓誌銘 鄉進士

述南趙公墓誌銘

啓

答徐觀我蜀撫啓 賀李建霞人相啓 與馬

康莊少宗伯啓 賀何芝嶽宰輔啓 候何相

公啓 上沈相國求遷啓 上曾禮部求遷啓

請學臺啓 謝汪撫臺薦啓 上禮部馮尚

書求遷啓 候周司業啓 賀楊司勳新任啓

賀陳司理新任啓 上李侍御啓 上高侍

御啓 賀朱侍御新任啓

簡齋先生文選卷之一

曲周劉榮嗣敬仲甫著 孫佑雲麓甫編輯

毘陵惲于邁涵萬甫

楚黃黃正色美中甫全較

海陵鄧漢儀孝威甫

疏

恭謝天恩疏

題爲恭謝天恩事該臣以庸品微才謬蒙簡用疏辭未允謹於八月二十六日陛辭卽日就道至九月之

一日行次天津遂舍陸就舟一面閱視北河一面催
饋回空以本月八日入德州境據淮海道副使周汝
璣將前督臣朱光祚發收河道關防一顆符驗一道
旗牌六面副并書吏文卷差委淮安衛指揮李天鱗
齎送到臣隨經臣叩頭祇領接管受事矣臣至是而
滋懼焉臣叨督七省自京灣歷北河中河南河之瓜
洲儀真以達於江計程三千五百里而遙爲漕運經
行之道設有歲修舊額而淮黃至清河口合流東經
安東縣以入於海近年海口沙淤下流壅塞水無歸

宿遂決蘓甯及建義口淹沒興鹽等縣蕩爲大澤臣
前承召對親凜天語若祖陵之關係運道之通塞責
任重大深厯聖懷又奉勅書內諭臣殫心竭慮輸忠
效勞臣實戰慄悚懼恐不稱 皇上任使又何敢諉
卸以自速於戾臣一至濟寧當兼程恭謁二陵親歷
決口築堤砌石濬淺撈沙拯下巢上窟之顛連挽排
山倒海之泛濫衛陵通運臣不敢遺餘力也至若湖
口河洪泉脈閘座凡可往來經理先事綢繆者臣不
敢恤胼胝也而河上之帑藏必清逋欠必完河官必

恪供本職不得營求差印其司道有司亦須同心共濟有不職者臣不敢愛情面也蓋臣矢以一念忠信對君父格神明率屬吏以報主恩於萬分一而已謹將受代日期恭疏奏報並陳謝悃臣下情無任感激屏營之至

恭謁二陵閱視河道疏

題爲微臣恭謁陵寢閱視河道謹陳所見仰祈聖裁事臣自陞辭以來日夕冰兢念祖陵之擁護運道之經由民生之休戚責重任艱何敢不竭蹶從事於九月二十二日抵濟寧八日內清消積案十月初一日乘舟南下至桃源縣陸行趨謁二陵伏見川岳環拱風氣鍾毓開國家萬年有道之長從古未有東至淮安府同總漕督臣勘閱建義決口口長三百七十餘丈俱以埽障之埽以柳爲骨以葦草爲附而束以大

繩每埽長五六丈不等橫置地上高一丈二三尺不
等置水中慮其浮則以土壓之慮其衝徙則以江船
大鐵猶置河中留之以杉木長三四丈者釘之截流
而前與水爭勝此處爲淮黃合併東流入海之路奔
濤駭浪駭目驚心今止餘十丈許水益急益深爲力
益難每下一埽推拽用數百人埽下水激連先下者
岌岌欲動使人神搖氣奪不敢易言河海中事臣非
親歷其境亦不知此工之鉅且艱也自淮安至此已
幾百里兩岸無堤水溢則出漂沒之患在所不免建

義其全河俱奪者耳此堤之廢不知自何時積漸以
至於今今卽議復亦恐非一朝一夕之力也次至駱
馬湖湖淺而寬止東堤一線可緣又添黃河之水急
湍如箭重運從下而上無怪其費力多而行船遲也
今開陳家溝於湖堤之東溝隘於湖出口處亦平於
湖北口底岸皆土漸南爲礮石者六里許挑濬費力
春夏間開而未成分渡重運剝船十之二三臣率司
府各官督委河工佐貳等官加以賞犒作其勤勵本
計仲冬之半可完庶幾運至無阻獨是各屬懈弛日

久違玩成習當此併功急修之日猶然提夫不到提
工食不到臣心自急而郡縣漠然卽 皇上震怒立
逮前河臣朱光祚而郡縣仍復恬然今約至歲終方
得竣事而水寒冰結事倍功半明年大修黃河官多
役衆儻更泄泄如此其何功之能奏黃河決處臣已
親履得其梗槩行令司道覆議容與高家堰開塞事
宜另行專請先以勘過地方會同總漕督臣楊一鵬
淮揚按臣劉興秀據實具疏上塵御覽以覆治河事
情著總河及該撫按確商具奏之旨併乞天語申飭
沿河大小官員一以聖明之憂爲憂微臣之急爲急
人人同心事事應手方克有濟如有仍前怠玩呼而
不應者容臣不時叅奏從重處分蓋夫役偶遲工食
偶悞其罪似小而水消水長止爭時日過時失事後
雖欲補莫可用力分爲諸臣之小過合卽河臣之失
職矣臣於召對時面奏 皇上凡事料理早則易而
遲則難今又烏敢嘿嘿自悞以悞河工耶

建義決工告成疏

題爲恭報淮安建義決工告成仰慰聖懷事本年十
二月初六日據管理南河工部都水司郎中降二級
管事徐標準海兵備道副使周汝璣呈蒙臣及總漕
部院憲牌照得建義決工奉旨築塞刻不容緩牌仰
司道嚴督官夫上緊僱做夫要實役料要實用費覈
工堅尅期竣報立等覆覈會題等因蒙此案查本年
三月二十三日蒙前任河漕兩部院憲牌爲遵旨會
勘估計淮安塞決工程錢糧事本月初四日准工部

卷之一
六
咨會題前事奉聖旨工部知道部覆奉旨河工動支
錢糧及督課省試事宜俱依議應用各官吏部速覆
朝廷以陵運民生關係重大故不惜多金冀垂永利
若復玩愒遷延貽害不小一切節浮估覈實工定限
期酌罰例等事卽著河漕督按官詳明條奏來行欽
此咨院遵行去後原估挑引水河一工塞南決口一
工塞北決口一工共銀八萬八千三百一十五兩零
時淮庫不滿萬金原任總河朱部院於凡各省直應
留應解應追應借銀兩嘔心撙查催解分項登簿行

令轉發淮安府知府推官及山陽縣知縣星速支辦
逐季循環簿報三院會查原任總漕李部院督該府
縣官遇有續解銀兩當催分發淮南淮西淮北各府
州縣協辦土產各料守催管工各官俱限二月初旬
盡赴工所然解銀地方遠近各一二千里二三千
里不等辦料地方遠近各四五百里六七百里不等
往來解辦動費時日本司二月十五日移駐本工會同
本道督率題委各官有料作埽無料築土銀以漸集
夫以漸增經管引水河工廬州府通判陳國鑑二月

初九日到工募夫三千六百名分爲二十四工僱催挑濬土方十七萬九千有奇五月二十七日開壩通流黃淮洶濤藉力分洩矣經管南決工揚州府通判楊之屏二月初八日到工每工用大馬頭埽每埽高八九尺長五丈層累而二作一馬頭肚埽土牛酌量增用計高一丈八尺濶五丈以次僱進築成堤工長一百四十四丈六月二十一日閉泓堅塞黃淮奔流已遏南徙矣經管北決工安東縣知縣何璫二月初九日到工因水溜料少三月二十一日方進埽工做土埽工七十餘丈推陞離任管河同知孔從先於四月二十三日接管見北岸沙淤工艱先作南岸工程水深至三丈二三尺許內外埽層累而五堤高四丈中土槽如之五月間水長愈溜衝蕩愈深椿亦不能到地埽亦不能到底土亦不能禦埽本官一詳再詳部院一批再批各官會議千萬其難本司隨具河決大役竣役無期一疏本部覆議奉有詳酌料理之旨本司率孔從先風雨急湍中艤舟測探於二十丈下覓有淺水實地一路堪作截河埽壩上流大壩吃作

磯背刺水北向轉闢故道築可施工工程隨宜經理
錢糧通融支辦嚴督鳩僦設法圖成題奉欽依堂劄
科杪孔嚴部院檄劄游至本道督同知府汪心淵推
官王用予知縣王正志肆出催料接濟手口卒瘡疾
如救焚本司躬督河官孔從先星火拮据兼日兼夜
兼雨兼風鞭策僨進土埽工程恐底通流又調題留
原任高郵州同知韓汪密打井椿堅作月壩斷水多
方經畫嘔盡心血恭遇本部院與總漕部院乘傳式
臨密授方畧賞罰信必人心鼓舞畚鍤爭先十一月

二十八日共築完二百八十六丈閉泓告竣一時滄
水回瀾千村平土兩河順軌大海朝宗東南半壁之
乾坤竚見桑麻疆理之復舊矣是役也挽兩大瀆橫
流之衝作數百丈柱砥之堰有引水渠有順水壩有
利水磯有截河埽有接堤有鉞堤有井椿月堤相天
時之寒燠酌水勢之緩急覈地形之堅瑕辨泥土之
真僞驗物料之臧否稽轉運之後先節人力之作息
振夫工之勤惰嚴繕作之疏密覈金錢之度支夫亦
智盡能索心殫力疲矣回思六七月間海嘯河漲怒

浪排山八九月間埽束水狹驚濤浴日十月間中泓
無幾衝深數丈兢兢守督如臨巨敵職等於此成敗
利鈍未敢逆覩仰賴 皇上如傷一念默徹玄穹百
靈協應追美宣房本部院與前部院饑溺繇已經畧
多方各官戮力急公因以底績再覩堯天司道焦思
承宣督率料理亦惟日鞠躬盡瘁歿而後已耳遑計
有他從來河工告成皆祭告賜名稱賀紀元以彰盛
事以洽神人茲淮東大澗新溝建議相繼成功真昭
代之偉造也伏乞速賜奏報馳慰聖懷至府廳縣等
官黃沙白浪之間赤日烏風之際胼胝苦痛致命勤
劬勞莫可泯併乞甄敘以示鼓舞其支辦錢糧已催
廳縣官卽行確查覈銷善後事宜已催廳縣官卽行
確佑覈報另詳等因到臣該臣看得建義三工關係
民生命脉當其未告厥成上履聖主之焦勞下苦閭
閻之胥溺臣自蒞任卽行查催除南決一工并挑引
水河一工業已完報惟北決一工工鉅任重尚未竣
役當行檄催旋復親在督促見中泓無幾衝深數丈
惴惴然憂厥成之未易覩也與總漕督臣楊一鵬宣

卷之一
布 皇上憂民至意祭告河伯明功令以敦率河官
昭恩威以鼓勵夫役而司道府廳印河各官職思匪
躬願效盡瘁之義夫役亦感奮子來共竭趨事之勤
遂當橫流之衝奪全河之勢成砥柱之功此皆我
皇上威靈赫濯使百神效順臣民宣力之所致也除
用過錢糧容臣會覈奏銷善後事宜督行司道次第
料理有功員役查明另敘外謹將完工日期合先題
報

建義告成欽賞謝恩疏

奏爲恭謝天恩事崇禎七年二月二十九日准工部
咨爲恭報建義河工告成仰慰聖懷事該本部題覆
前事等因奉聖旨建義河工告成諸臣著有勞績楊
一鵬劉榮嗣各賞銀十兩劉典秀賞銀六兩徐標旣
陞任准復原級免戴罪周汝璣量陞一級汪心淵王
用予王正志韓汪各與紀錄陳國鑑准復級堤名依
議周士樸在內籌畫前降一級准開復欽此欽遵移
咨到臣時臣巡歷宿遷聞命自天不勝驚喜隨設香

案望闕叩頭訖伏念臣性原鳩拙見復蠡窺河渠當
極做之時淮揚遭異常之浸謬蒙簡任竭蹶趨工仰
賴聖神之功用遂使河伯之效靈在外宣勞固心力
可念居中定議亦籌畫有成渥被皇恩猶堪負荷若
臣未親畚鍤徒效馳驅不過因事於人何敢居功於
已績輕賞重感極愧深拜此逾涯之賜矢圖效於將
來罄此未盡之年恐難酬夫罔極臣曷任激切屏營
之至

再報水發疏

題爲微臣躬閱河道再報水發情形陵寢奠安仰慰
聖懷事臣於七月十七等日據淮徐兵河道臣徐標
等各呈報山水暴漲異常衝潰田廬堤岸各等因到
臣已據實題報訖臣卽自濟寧登舟南下遍歷河道
諏諮發水之源皆緣蒙陰諸山水發自北而南又兼
黃水暴漲與山水會一望汪洋舟浮樹杪駭人心目
土人謂從來洪水汎濫未有如斯者臣又恐暴水浸
嚙歸堤爲陵寢患親率司道胡璉徐標等至堤周廻

查看堤之九堡以下水勢消落八堡以上雖有波湍
縈迴亦無衝激之勢較今春臣會淮揚撫按勘議河
道之時更覺微細此皆皇仁格天諸神呵護以妥祖
宗之靈非人力所能爲也夫黃河關係陵運民生三
事耳今河從徐州長山決口全河東注灌入連汪哈
蠓周柳黃墩諸湖四散瀰漫出駱馬湖口歸黃正道
可爲陵寢大慶而邳睢之民亦借以甦數年滄沒之
苦矣但山水驟發易落爲害猶輕黃水到處多沙爲
害最重而王市泲河運道一段淤梗舟楫不行黃水
退消之後淤墊在所不免將來新運之難恐更甚於
今歲也臣督令司道胡璉徐標等先詣邳徐上下熟
籌濬塞之法俟臣會勘儀真沙洲事畢再與撫按司
道等官同勘大治工程研加確估另疏外謹將先勘
河形據實馳報

崇禎七年九月內奉

聖旨據奏歸仁堤水勢漸平陵運奠安知道了泲口
黃水多沙預防運道淤墊熟籌濬塞確估修治
劉榮嗣著作速料理工部知道

覆勘黃河疏

題爲遵旨覆勘黃河會議已定懇乞聖明速勅興舉以救危急運道事本年七月初四日准工部咨爲遵旨會勘黃河計估工費據實上請仰祈聖明勅部查覆乘時興工以奠陵運民生事咨該臣等具題前事等因奉聖旨這挽河事宜據奏估費至五十餘萬用夫至六萬餘名如此浩大工程總河撫按道司未見親行詳勘會議但據兩廳州縣各官冊報是否確實可必成功永賴無患著該部會同該科博諮覈議具

奏欽此又准工部咨同前事該本部題覆挽河估計等因奉聖旨河工重大著總河官會同該撫按督率道司親勘確估要見功必可成利必永賴聚衆無擾實費無糜經始何方竣役何日一一詳明具奏欽此欽遵移咨到臣該臣一面檄行各該司道等官遵奉明旨覆加勘議一面會同撫按仍督司道廳印河官親詣河干周遭詳勘商度緩急集議已有成說隨據管理中河工部員外郎胡璉管理夏鎮工部員外郎趙士履准徐兵何道右叅議徐標呈蒙臣并撫按兩

院案劄該司道督廳印河各官追隨本部院會同撫按兩院身親周勘得河工關係之重首陵寢次運道乃河患至今極矣事必尋源工先救急案查先年糧船出淮卽繇黃河行運上至徐州入大浮橋關河北去是黃河卽運道也惟時因運重黃分防嚴密雖有橫決旋加塞治自議開泲河與駱馬湖爲運道河防寢弛三十年來兩岸淤平沙高河壅中飽上潰天啓七年至崇禎五年決露字舖雲字舖呂字舖城安青墩等口南衝歸仁堤以逼祖陵駱口無水外堯陸

溜稽運六年六月間又決長山口前部院題請三十萬金大治本司六年九月到任追隨本部院徧勘徐邳三百里黃河積弊大壞不可收拾以新運緊急先理運道今年三月內三院並集周爰諏度共估銀五十三萬餘兩運畢題請奉旨覆勘而伏水大發黃河盡歸長山決口今復率廳印河官追隨三院自宿至徐逐一沿勘則河勢視前勘又大變矣前正河平分黃河尚可通行今僅深四五尺不等或流或停前泐河止有五分黃水與清水相盪而行未曾淤墊今全河北下漫至南北山根梁城閘等處清水壅遏十二里牽路湮迷王市以下運道淤塞三十餘里雖幸祖陵奠安而河患全在運道矣若再不挽黃歸正無論上決之禍無已目前泐河之淤塞難濬正河且漸涸難行兩路俱梗爲憂方大從頭磨筭則原估錢糧未可議減但挽黃原限六個月完工恃有泐河行運耳而今以黃河爲運道何能久待不得不就中擇其捷者急者併力僨做爲新運救急之圖據徐屬同知姚來瑄署邳宿河務經歷韓汪勘明詳議自徐州以上

疏深大浮橋舊運河三十里而塞夏鎮彭壩之水盡使南出以待糧船入口下自蘓伯挑全淤故道五百五十四丈接挑天地玄三舖半淤故道二千三百七十丈引水會樊店旋河之流併歷呂梁東下又自鯉魚山下至邳州直河口挑全淤及半生地一萬一千五百二十六丈南塞呂字決北築匙頭灣馬路口窪堤東水順下直河更照原估早辦料物在長山口上築基下埽逼水一半回東此河一通則上下貫徹糧船抵宿一簣牽挽而至徐轉從大浮橋啣尾北上其挑河夫役合用五萬餘名或先調別屬之夫或發印官分募立刻動手十二月完工儻黃河半歸故道運河水消或挑或開尚可相機着力以圖兩路行運至堤工一時不能併舉移挑河完日之夫接續興工次第告竣大治事宜亦可槩成該臣會同總督漕撫楊一鵬巡按淮揚御史劉典秀勘得挽河歸復故道原以奠陵利運近河勢又復變更自五月間勘估具題之後伏水驟漲長山決口黃水盡注沭河陵寢雖獲奠安而運道全受其害自梁城闌下壅淤十二里王

市口下壅淤三十里泃河已屬梗阻則急挑黃河以
行新運誠不待再計並難刻緩者也但遽欲挑河築
防塞決三工並舉使黃流盡歸正道時既無幾勢亦
不能况遙縷等堤修築未堅儻水復散漫不惟運事
無濟其憂仍在陵寢今合謀僉同議先挑河暫挽黃
流一半歸復故道少補殘堤緊要缺口使不旁溢則
既不侵陵又可行運併力一工可計日報完此目前
之權宜亦治河之先務挑河完日接築堤岸盡塞決
口以竣大役計甚便矣况自宿遷至徐州大浮橋以
抵呂壩原係昔年運道自開泃河久未濬治今議經
始自大浮橋起至夏鎮呂壩止疏濬深通在黃河自
蘓伯接挑天地玄三舖引水會樊店旋河之流併力
呂梁東下又自鯉魚山挑至邳州直河口南塞呂家
決北築匙頭灣馬路口窪堤東水順下直河更於長
山口築基下埽逼水一半廻東則黃河上下流貫再
閉彭壩使水盡南出大浮橋則兩河內外通徹是黃
河與漕運合併歸復故道也明春糧艘可自此而達
通灣矣共計用夫五萬五千三百餘名除調徭夫八

千名外其餘派調山東河南南直廬鳳淮揚徐州各屬俱令印官召募土著土著則無逃亡譁謀又以佐領職官部押前來分工僨做統轄有人衆自不擾前疏議以六個月完工今糧運轉盼卽至通限九十日完工放水行運工完之日卽移其夫築堤塞決而次第鳩僇如此則於大治中但有先後而無增減雖有暫緩而非偏廢極臣之慮竭臣之力以冀成功至於一成永利則大河之性旣難長保修疏之力又在後來臣惟有心可矢捐糜不惜以報皇上而已至聚

夫數萬必須彈壓容臣等檄調淮徐濟營官兵鎮守以防不虞惟是覆估錢糧仍計五十三萬餘兩臣等本欲覆減緣工程浩大難以意削如有剩存仍歸河用恐尚不足另須酌請至臨工賞犒等項當撥曠贖以示鼓舞可也萬祈聖鑒勅部速覆亟行措濟行臣等遵奉施行

報回空過濟禁私載疏

題爲恭報過濟回空船數仰慰聖懷并請申飭督糧
諸臣預禁重船夾帶私貨以速新運事該臣今年自
春徂夏料理河道催僨重運甫畢隨檄沿河司道印
河等官逐程趕催回空不許攬載私貨星夜南下去
後據管理南旺閘工部主事汪邦柱呈稱據管理運
河兗州府同知翟凌雲揭據濟寧州天井閘報自崇
禎七年七月二十一日打放過回空糧船頭幫龍江
等衛指揮王環旗甲張承業等起至九月十四日打

放過尾幫新安衛指揮李萬春旗甲李姜興等船八十六隻連前通共六千八百七十隻其後尚有趕幫船隻自是回空落後零星計亦不多等情報職轉揭到司呈報到臣據此理合具疏上聞仰慰聖懷爲照漕與河兩相須兩相成者也漕糧北上固賴河道深通而領運官旗亦須一意奉公然後數百萬軍需乃可遄行無阻今歲重船回空幸得依期過濟矣然中間梗阻艱難調停催挽不知費沿河官員夫役幾許心力而後苟竣一年之局臣鯁鯁爲將來之慮者私

載不可不禁也查漕運議單萬曆十二年題准一款凡運軍土宜每船許帶六十石沿途遇淺盤剝責令旗軍自備脚價例外多帶者照數入官監兌糧儲等官水次先行撥簡督押司道及府佐官員沿途稽查又萬曆十三年題准一款運軍土宜每船除六十石外若有多餘或違禁仍載竹木沉重等物及沿途收買貨物者將貨物盡數入官仍將違犯運官指名叅治如經管地方盤驗官員徇情賣法聽河道衙門叅處開兌之時糧儲加意簡查違者亦同叅治煌煌令

甲誰敢奸之臣憶今春舟泊駱馬湖每見重艘停阻
竊疑新挑河身淺澁一面探治一面撥夫代拽適有
朽敝失風船隻盤糧起剝下視皆私貨也因訊各船
無船不有私貨凡私貨皆匿艙底而覆漕米於上喫
水嘗至四五尺六七尺一遇阻閣橫艇河心一船滯
則百船俱滯責令起卸則瞋目橫恣不可嚮邇蓋此
輩惟以鬻賣獲利爲事貨一日不賣盡則船一日不
肯前多方延挨方催入口放棹中流行不數里復停
河畔嶧縣知縣催促甚急便行聳毆幸漕臣適至鎖
責而解此其風烏可長哉始不過謂運卒之苦不妨
少加矜恤耳豈知其敝一至於此今回空旣南轉盼
重運卽北此弊不除勢必年年稽悞或至決裂不可
收拾臣用是直陳伏祈 皇上亟勅省直督糧并漕
儲道及押運府佐等官務於起兌之時申嚴查驗除
應兌漕糧例帶土宜外不得夾帶私貨如有徇縱聽
臣河道衙門叅處蓋旣載則護之衆載則衆護之奪
之中途難爲割禁之始事易爲力但得船無留滯運
務早襄不惟河臣免於罪戾而所裨於國計不小也

臣草疏方畢接據漕儲道臣張魯唯詳稱漕白二糧
議單悉用中船向來白糧悉遵何至今年駱湖阻滯
止緣奸狡船戶輒做官座分列十三船底皆平濶入
水復深可容三千石又挑攬客貨反倍糧數昨如崇
德縣范泰之船以裝重客貨發漏沉溺長洲縣申吳
成之船以裝載回弁輜重露風焚劫乃若回空廣裝
客貨因而投託索詐驛官打搶民船此又本道目擊
相應禁革大艘以復中料伏乞批行本道關檄道府
禁諭等因到臣臣已批行白糧改用中船矣因思今
年漕糧如江廣浙省俱多大艘該道既查議單漕白
悉用中船豈容聽其撐駕目艦多裝私貨合無并祈
天語申飭各該衙門行令省直道府一體遵照漕白
二糧悉令中船如有裝載大船過淮之日聽漕儲道
臣查驗叅呈處治庶法令彰而弊蠹革矣

崇禎七年九月內奉

聖旨運船例帶土宜漕規甚明近來多裝私貨以致
阻閣延挨誤漕不小今後著督糧漕儲押運等
官於起兌申嚴查驗如徇縱故違者指名叅處

其漕白二糧悉用中船事宜該部知道

請協濟大挑錢糧疏

題爲河工肇興經費不繼懇乞聖明勅部亟議協濟以襄厥成以圖永利事該臣奉旨覆勘河道隨經會題卜吉於閏八月二十三日祭告分工募夫辦料興作間九月二十日接工部咨爲遵旨覆勘黃河會議已定等事該本部題覆挽黃大治等因奉聖旨據奏挽黃濟運工難刻緩挑河築堤塞決三事次第興舉亦見區畫明悉旣認限先竣挑工着督臣卽親詣河干責成司道官畫地督理其辦料募夫管押催僨等

項州縣佐領衛所武職酌量委用印河經管各官如有稽悞侵冒等弊不時叅處准徐濟營官兵俱聽便宜調度彈壓應用錢糧先儘見貯河銀及所留遼餉動支應補登餉及省直拖欠著卽勒限催解戶部協濟既有成例著於截留漕米照數取用外仍再議酌助共成漕輓大計以圖永賴欽此欽遵移咨到臣臣捧誦綸音敢不竭蹙料理急圖成功以副 皇上委任至意除已見駐河干督催鳩夫辦料星夜僨做外惟是估計錢糧五十三萬餘兩見貯不過十萬有奇其各屬借欠二十五萬雖檄催如雨奈西江之水無濟目前之涸昨部覆內據漕臣六年歲報河道錢糧冊以爲見存二十九萬不知六年建義高堰曹單河南諸工歲修銀兩業已支用但未經覈實未及奏銷其實實在止十餘萬耳昨儘見銀募夫辦料將已罄盡時下聚夫五萬餘名日費幾二千金江北頻年水潦蝗蝻爲災米價騰貴二金不抵一金之用各夫皆枵腹供役則目下需米尤急查往例太挑朱旺之役估計七十餘萬戶部曾協濟漕糧輕齎漕折鹽課等

銀二十餘萬更益以馬價料銀然後大役始興向猶止是治水使之安瀾耳今則重以運道梗阻所關尤屬喫緊而協助不及十分之一若乃窮夫以無食而散驟難復聚則患在運道不可救也萬一奸人以無食而譟則驟難消弭患在地方更不忍言也用是不辭煩聒仰籲聖明軫念河漕相關數萬人夫待食河干亟勅該部查照大挑成例於全佑中協濟三分之一再留漕米十五萬石仍撥漕折輕齎銀十萬兩以濟目前急需庶幾河工速成其於陵運民生所裨不小矣

崇禎七年十月二十二日奉

聖旨議留錢糧昨已有旨這所請銀兩戶部看議具奏

流寇逼近鳳陽疏

題爲流寇焚劫重地陵寢可虞謹據報奏聞懇乞聖
明速賜遣將徵兵亟圖剿滅事本月二十一日據署
潁州道事淮徐道右叅議徐標稟報爲緊急賊情事
稟稱抄蒙撫按兩院憲牌爲印信事會委本道卽將
潁道印務查明帶攝嚴督城守以宿州爲駐劄之地
北援蕭碭西應潁亳仍遊巡逼近中州郡邑等因蒙
此本道才媿兼人又徐州重地河漕事急恐成兩誤
詳請改委未蒙批允至十六日據鳳陽府壽州差官

郭一驪齎送勅印至徐本道兼程抵宿十八日開印
視事擬卽西往壽頴防禦適接壽州總練指揮趙良
弼馳報本月十二日早自正陽鎮來騎馬流寇千餘
沿路焚劫直抵城下攻擊甚急職與營兵及軍民極
力固守幸保無虞仍用砲打殛八賊拏獲上城一賊
至十三日又義勇陳世元等擒獲流賊一名號二天
王紅驪馬一匹審供賊衆數多當卽梟示等因據此
中途又聞十五日流寇已至鳳陽焚劫逼近陵城職
不勝痛愕頴道原無中軍兵馬又各路兵將撫院檄
行徐州狼山兩副將調度節制職初至宿聞處處皆
賊東西交訌本道并無一兵一餉一面嚴督城守料
理防禦一面請撫按兩院督催將領剿滅仍乞本部
院念根本重地未容戎馬橫行火速題請大將提兵
剿捕等因到臣該臣看得流賊竊發非一日矣蹂躪
晉楚中州諸省已成燎原之勢不意今且搶掠霍丘
正陽圍壽因頴遂至焚劫鳳陽夫鳳陽陵寢重地祖
宗衣冠在焉萬一賊志橫肆誠臣子所不忍言查頴
州道臣已推濟南道叅政謝肇玄除一面檄催赴任

料理外惟是賊勢鴟張倘南向則留都根本可慮東
逞則淮揚漕運可虞臣用是憂惶據報入告仰祈聖
明軫念祖宗陵園關係重大淮揚漕運咽喉勅下該
部速議簡擇大將卽於附近地方徵集大兵併措糧
餉會同撫道諸臣合力進剿宗社幸甚地方幸甚

崇禎八年二月初三日奉

聖旨據奏流寇焚劫鳳陽逼近陵城朕深震惕該撫
按何無預備堵擊致茲猖獗着一面嚴督道將
會同豫撫殫力截殲如有疎悞定行重治秦翼
明及楊御蕃兵俱着遵旨星馳趨鳳援勦不得
刻延其餘調發將士兵部通馬上檄催仍將到
彼日期馳奏

再報流賊攻劫疏

題為再報流寇攻劫地方懇乞聖明勅部速調大兵
 堵勦事據濟寧道副使徐九章稟稱本月十七日忽
 接曹縣報謂中州之流寇已攻破汜水滎陽密縣等
 處去曹縣止二百里而近據此合行稟報等因又據
 臣標下中軍副總兵官劉承胤稟稱正月十九日接
 職家報稱流賊已抵中牟縣聞難民口稱流賊攻開
 滎陽等縣焚掠甚慘逼近大梁其勢洶洶臨濟之間
 賊寇垂涎已久理合稟報等因又據徐州州同湯大

耆稟稱賊寇已至碭山去徐不遠該臣看得中牟縣距曹止二百餘里碭山距徐止百餘里曹單係山左門戶徐州則係漕運咽喉曹單沿河千里防兵寥寥徐州向遭黃水內罕居民萬一寇至誰與爲守懇乞皇上亟勅該部調發官兵於扼要處所一面防禦仍集大兵速剿勿使滋蔓抑臣更有進焉賊勢日甚一日蓋因兵力不齊人各自爲計耳以今之勢當自徐州及曹單以至河北滎澤孟津等處沿河設兵立以烽堠使賊不得北渡潼關爲陝西要區必有大將統兵鎮守使賊不敢越秦汝寧襄陽光化爲全楚漢川通衢使各將提重兵彈壓賊始不敢窺楚又儀真金陵沿江一帶則以操江之兵列營防守使賊不敢南向中州地方收集村落人民州縣各練鄉勇自爲固守而以各鎮將之兵合力接剿接剿必用邊兵防守則民亦可近來海不揚波卽登兵可以西來幸而外未窺邊雖保鎮可以南下刻期殲滅以救此腹心之疾不然賊勢披猖飄忽不定到處有奸民勾引轉相增益目下山陝河南湖廣徧地是賊近復殘及江北

地方而山左亦岌岌自救不暇萬一狂奔江南則財賦益窘或東阻運道則南北不通其爲國家慮尚可言哉臣不勝杞憂激切上聞統祈聖鑒施行

請官兵剿禦流寇疏

題爲流寇之警日聞山東兩直在在可虞懇乞聖明勅諭嚴防共圖撲滅事先是流寇南掠鳳潁北薄碭山業已兩次具報本月初二日據兗西道僉事冒起宗塘報正月三十日巳時據河南武舉曹縣人邢顧言報夏邑流賊甚多歸德守備戰無踪影商令奔入夏邑本日午時又接劉總鎮塘報稱本日一更時分遙見虞城火光接天賊又復近黃河等情到道看得單縣接壤碭山彼岸攻圍甚緊夏邑虞城與曹對面

已見烽火相連單急而曹又急綢繆堵截萬不容緩等情又據臣標下差官鄒學伊稟稱蒙差南直偵探探得潁州十一日已破其王莊地方民亂打搶甚多十六日紅心驛搶劫銀鞘殺死解官馬副將今駐劄棗林等情又據臣差官董家邦稟稱蒙差河南探賊探得流寇燒盡永城關廂今在夏邑劄營又據署邳宿廳事經歷韓汪稟稱職在邳州督工二三日來人民驚慌大是亂離景象職抱印河干約束禁止不下請兵彈壓等情各具報到臣臣惟歸德與曹縣止隔一岸而碭山與單縣地界相連近賊焚掠河南官兵追襲勢必急奔河北萬一闖入則山東河北地方禍不恐言曹單一帶山東撫臣已發官兵聽兗西道僉事冑起宗調度并臣檄行該縣各集鄉兵列營防守又檄濟寧道臣徐九章督濟營官兵防衛魚臺等處與兗西相爲犄角兵勢旣張可稱無隙矣第橫流易禦順流難防曹單魚臺之守雖嚴倘賊自上流乘舟東下何處不可登岸今濟寧要地已極空虛沿河固圍之策惟有各府州縣亟集鄉兵自爲防守計耳未

能扼賊之衝也邳州連年被水城中止州衛官居住無民可與共守睢寧並空城而無之四方饑民做工就食豈能爲我防禦彈壓有兵苟不爲亂幸矣而淮徐俱已無兵可調非得名將速領大兵從豐沛徐州西會豫撫共圖剿滅恐賊或乘間而東並爲漕運之患查原任援登總兵楊御蕃胸富甲兵志存忠赤若用以防漕剿賊可朝拜命而夕受事除禦寇事宜臣已移會北直河南山東江北撫道嚴緊設防外據實入告懇乞聖明勅下該部速覆施行

責成司道理河護運疏

題爲遵旨提兵防護祖陵責成司道督理河工防漕僱運事臣自二月十四日督率濟營官兵前來徐邳等州縣料理河工僱護糧運本月二十七日舟次邳州接吏部咨奉旨暫帶總漕事務二十九日接邸報奉旨提王佐才兵馬防護泗州祖陵漕運一帶該道府州縣統率鄉兵據河防守臣卽時差官持令箭飛提王佐才兵馬星夜赴泗及檄泗州守備整點官軍多備器械火藥在陵防衛候臣到調度偵備臣查挽

黃大工挑河已完放水通行因磨莊舊河水溜續挑直河避溜行運亦已工完另疏題報見催各幫官旗從劉口入直河達邳徐北上其築兩岸長堤關係陵運民生工鉅費缺前疏控籲皇仁那處濟急未蒙俞允各省直雖有積欠河銀然地方災荒兵火勢難亟徵緩又不能濟事俟再具疏懇請維時伏水將近畚鍤刻不容緩遵照題估原疏派募徐邳海宿等州豐沛蕭碭睢宿桃安贛沐靈五虹等縣各募夫二千名責令該州縣親押赴工分工管做計土方給銀先儘邳睢緊要之處築起勒限報完後有堅瑕卽係該州縣之責其青墩城安半戈山郭家樓匙灣雲餘露呂等堡各舊決低窪之處恐水長旁溢先行該管知州郭郭知縣楊鎡各派官夫加意修防該管中河分司胡璉察處以錢糧未銷河工缺人尚留料理特委淮徐兵河道右叅議徐標專駐董口督同該司協力修防卽護漕饋運又嚴飭沿河司道督率府州縣印河各官分布官兵鄉勇防護外爲照漕與河國家兩大事平時猶恐難治而今寇逼之分治猶恐不足而臣

兼攝之卽寢食河干應時催督未易勝任乃奉旨護
陵則又躬詣泗州漕河諸務雖不敢諉卸於已不得
不暫託於人催僨糧運幸巡漕御史倪于義經畫有
方丹衷爲國沿河諸臣領運各官奉令惟謹自足辦
此挽黃堤工則委道司徐標等督諸印河官拮据鳩
僝計日竣事至於帶攝總漕事務查北糧限尚有刑
司分猷文移可以遙理臣因防護祖陵已於三月初
二日自駱馬湖起程馳赴泗州謹將督工僨運轉委
緣由并起程日期具疏上聞

崇禎八年三月二十二日奉

聖旨防護祖陵自應遵奉明旨萬分飭備劉榮嗣以
任總河濬築原屬本務必漕艘通行無阻方爲
勉修職業不得但以分委道司等官卸責該部
知道

典星速在代吏部一面具本來行田光宇范文英朱
斐楊如桐陳圖徐士選俱著革了職該撫按提問究
擬罪宗失散的著訪查下落具奏朱國相照例議卹
該衙門知道欽此二十九日又爲東南大兵漸集寇
氛突北宜防等事准兵部咨該本部題前事奉聖旨
流賊刻期掃除必須布置嚴密以杜奔馳突逞凌漕
重大東南根本尤宜力保無虞劉榮嗣馳赴泗州提
王佐才兵防護朱大典馳赴鳳陽提馬曠兵堵截漕
運一帶該道府州縣官統率鄉兵據河防守該督府
仍遵照屢旨佐以銳師逐程備剿倪寵陳兵要害李
懋芳堅扼臨清賀世壽拒河間景州張其平捍長垣
東明晉秦楚蜀文武將吏俱著奮銳周防毋致瑕隙
楚師厚集許成名正宜鼓勵前驅相機援勦何得畫
疆退守若仍前玩怯縱賊麻黃東犯貽毒安慶立正
刑章其一切調度合勦事宜着洪承疇殫精料理務
遵限蕩平慰朕除暴安民至意爾部通馳嚴飭張鳳
翼署銜如何遺戴罪字面補正行欽此又爲祖陵關
係等事三月初一日接邸報該刑科給事中鍾斗題

前事奉聖旨祖陵關係重大已有旨著劉榮嗣馳赴泗州提王佐才防護兵部卽差人馬上嚴催不得少延致多疎悞欽此欽遵到臣該臣將河務卽行淮徐道臣徐標準海道臣劉若金分理隨一面調狼山營副總兵王佐才官兵一面調發濟寧營兵馬星赴泗州防護相度備禦情形俱已拜疏具題今狼山兵八百名已到暫令廟灣遊擊陶廷祥統領內撥三百名分防舊縣防護之計稍周又准漕撫督臣朱大典備將漕運關防吏卷咨送前來又接邸報爲南幫過淮屆期事該總督倉場程註題前事奉聖旨僭運漕糧原屬巡漕御史及漕道專責一應事宜着殫力料理不得稽悞該部知道欽此欽遵到臣爲照陵寢之於漕河皆國家重計當此黃河新挽之日運事正殷臣兩奉嚴旨責成料理而身在泗州去河六百餘里河工之事雖已題明責成兩道然事須商確者文移往返動經旬日今臣奉旨暫代漕務而漕撫朱大典今已履任巡漕御史倪于義新奉明旨漕務已有專責臣奉旨防護陵寢而按臣張任學入境護陵亦復有

卷之一
人臣止宿陵側未敢擅離或臣與按臣同駐泗州或容臣還駐河干督催運事其漕運關防仍當交還漕撫統乞聖明裁酌行臣等遵奉施行

崇禎八年四月內奉

聖旨漕務仍着朱大典督理餘有旨了

微臣治河無能疏

題爲微臣治河無能荷蒙寬宥恭謝天恩並報近日修河僨運情形仰慰聖懷事本年三月初七日准工部咨爲重運抵洪最早等事該巡漕御史倪于義題前事奉聖旨據奏運河尚多淤積磨莊水溜難行新挑月河又不如法劉榮嗣及道司各官所職何事通着戴罪料理星速踏驗挑濬務令漕艘並濟如少有梗阻必不輕宥倪于義職專巡漕功罪一體一應行運工力事宜卽着據實馳報毋得隱徇取咎該部知

道欽此十四日又准工部咨爲新河必不可行泃河挑工已晚等事又該巡漕御史倪于義題前事奉聖旨據奏新河險溜難行泃淺尚未疏治漕運何等關係敢於玩悞殊可痛恨胡璉韓汪俱革了任該撫按拏解來京究問劉榮嗣姑着降三級并于頴郭鄂王芳張應選曾良謨等都着先革了職帶罪星速料理刻期濟運另行奏奪如再延阻重典不宥中河分司該部卽行遴補勒限到任其沿河防護事宜着撫按確遵屢旨萬分隄備不可少有疎虞倪于義一面嚴行督飭仍將查閱情形不時馳奏該衙門知道欽此欽遵各咨到臣捧誦綸音不勝惶悚以臣治河無狀諸臣俱被嚴譴臣僅戴罪降職寬假隆恩如天罔極臣所爲恐懼無地而又感激不勝也然而新河之溜新河故溜也治泃之緩急黃乃緩也而就中時勢人力兼有難齊敢不據實剖陳於皇上之前自去秋黃水橫衝運道中斷臣與淮揚撫按徧歷徐邳睢宿等處見四野波濤中流淤墊廣詢博咨止有挽黃一法分水可以行運乃挑河袤延三百餘里分工督理

派伍司道時當沍寒臣寢處河干督率諸臣賞勤懲惰鼓舞興作三閱月而告成事隨委淮安府推官袁彭年按工文明正月十三日臣督各官躬親祭神犒賞官夫開壩放水臣於二十日試河乘座船自宿遷北上官民船艘一路通行臣乃有恭報挽黃挑工已完之疏而猶慮黃流帶沙通塞不時處處需人刻刻需防臣又嚴檄司道印河各官率夫修治二十二日忽報流賊披猖突至歸德碭山迫近濟寧運道人心驚慌臣馳還調率道將整兵備禦二月十四日寇氛

稍遠臣卽統禦寇之兵兼程赴工護運則呂字雲字露字等堡岌岌欲潰而半戈山之攔水壩新河口之匙頭灣以及青墜張林舖等處橫衝四溢勢且奪河臣親督募夫拮据十餘日開通直河立僨揚州等幫北上臣乃有再報開通直河工完避溜濟運之疏分派工程稽工犒夫臣自時時親履督視何敢一刻怠緩及臣奉命護陵寢與漕臣調淮海道管理半戈山等處淮徐道管理大浮橋樊店等處河南分司邳州知州並理直河中河分司邳宿廳並理王市等處其

駱馬湖口則漕臣自行督理且微服親查運船之挨
延不進者立刻重懲而諸弁軍旗乃始踴躍競進日
過船多者百五六十隻臣所謂處處需人刻刻需防
者幸漕臣之有同心而臣所爲計焉而未及行憂之
而未能豫者又幸漕臣之能共濟重運業已銜尾北
上猶可計日過洪不敢勞 皇上南顧也顧正月以
來地逼流寇驚逃接踵不敢更聚多夫於河上臣復
遠去羣心未免懈散文移未免稽遲而洪限已迫何
惑乎漕臣之大聲疾呼也夫河臣不能以河待運乃
至運到通河豈得無罪但念今日之河非尋常偶決
小罅之河今日之運道非前日偶澀小淺之運道今
日之治河非他處補偏導滯之治河人力有限勢重
難挽諸臣之中罪不一等獲罪之中或情有可原功
有可贖者容臣另分別入告臣實總理罪無可逃獨
蒙 皇上寬貸感激恐懼具疏陳謝伏乞聖明垂鑒
焉

崇禎八年三月二十日奉

聖旨昨倪于義疏稱漕船剝挽甚艱徐闡沙淤可慮

何輒云已啣尾北上計日過洪殊屬支飾劉榮
嗣着嚴督各屬星速濬治利運不得再有延悞
該部知道

挽黃治泐耽延重運實陳疏

題爲敬明挽黃治泐之實併陳重運耽延之故仰祈
聖鑒事邇自天啓七年黃水驟漲南決雲呂等堡直
射歸仁堤其爲患在陵寢崇禎五六兩年黃流復漲
北決長山等處其爲患在運道然是時黃水浸入運
道者十分之三耳而泐河固在也六年秋臣恭逢召
對親承天語嚴諭及履任見河道潰壞如此河帑空
匱如此乃急濬陳溝塞駱口僅完七年運事而七年
秋水大發長山盡決黃流全奔泐河梁城泐口王市

二百餘里俱被衝淤運道斬然中斷臣率司道於泃口一帶周遭探測挑挖審試一望瀾漫大半淤泥深者丈餘淺者六七尺不等人夫不能着力又無兩岸可作牽道而遷徙無恒通塞難料臣爲此懼廣詢博訪止有挑濬故道挽黃行運一策蓋不塞長山之決泃河必不可修不挑黃河故道長山必不可塞而塞決不築堤祖陵之患更大又與撫按司道諸臣勘估商確據司臣胡璉道臣徐標詳議挑河築堤塞決爲三事先挽黃流三分之水行運其築堤塞決次第興舉具題得旨九月開工分工爲伍三司兩道六廳四州縣官分督六萬餘人晝夜力作臣亦食眠河上省視鼓舞不敢少懈而漕臣初至疏請仍治泃河夫是時泃果易治也河上諸臣豈俱夢寐罔覺抑豈好勞喜危擔此三十年來共避之禍患而汲汲挽黃乎挑工以十二月告竣約費河銀一十五萬餘兩見今請官覆覈截銷正月十三日臣在呂堡祭告放水見客船滿載者往來通行竊幸新河甫成糧運可早卽日奏聞不意磨莊一段地勢偶有輒硬遂生跌溜臣相

會揚州等幫已過二月二十八日奏聞臣隨奉旨往泗州護陵漕臣復行司廳調集官夫治泐直河止船不行者二十日司廳等官再奉嚴旨革職提問其治泐也尚遺餘力哉而督浚王市之五百丈旋通旋淤覓路別行船始再入直河已過五百餘隻臣自泗州還抵直河七日內又過船六百餘隻是時進直河者從邳呂達徐六七日而入大浮橋由王市者從宿陽長山達徐二十餘日而始入大浮橋乃宿陽長山之間淤阻不時臣又往開泐口臣去而直河無船者又

二十餘日以致大浮橋脫幫十日蓋運卒狡悍惟私是圖遲回湖蕩之中任意遷延無官司之催促無私載之簡查所報漂流既無稽考卽有賣盜亦無關防故行王市者非國家之利而奸卒之利也至泐口復淤漕儲道再截重運入直河臣亦隨至督催連貢鮮船又過一百三十餘隻漕儲道去而運船復止乃俱停於徐塘勝王山之口徘徊觀望糧運稽遲以此夫豈河之咎乎而推論原本則仍歸咎於新河之不可行乃今邇之新河過船先如揚州等幫後如滁州等

幫最後如温州等幫皆從直口達徐如果不可行也則此一千三百餘艘豈飛挾而過耶且大浮橋一帶俱係新河第一工今年從直河者固進大浮橋抵夏鎮從長山者亦進大浮橋過船四千餘隻何以曰新河不可行也若曰淺溜所敗幾船所稽遲幾日可覆而按也乃糧船有剝米至三二百石者有米盡船膠猶難移動者在汴塘諸處不在新河也卽詞臣王錫袞三舟敗一其明驗也設使直河之船源源而進不致中斷四十餘日糧運之過濟不已久乎設使不挑新河而專恃王市行運河臣之肉尚足食乎然則新河非不可行運遲非因河梗不待臣言之畢矣夫黃河當治泃河亦當治但堤工未畢長山未塞雖糜金錢費民力而治泃未易易也今而後知臣言非妄臣始計非大謬也臣苦心表明剖陳欲悉不避冗長伏乞聖明垂鑒一字涉虛甘伏欺罔之罪臣曷任隕越待命之至

挽黃已成堤工應築等疏

題爲挽黃挑河已成應築堤工未半工大費繁經手
之官漸去循例恭請遣官勘覈截銷以清錢糧以明
功罪事竊照去秋黃河東徙運道中斷臣奉旨會同
撫按司道等官集議勘確會估挑河築堤塞決三工
共銀五十三萬先舉挑河一工挽黃流三分濟運分
爲五工委五司道程督自去年九月開土十二月內
告完約費銀一十五萬隨委淮安府推官袁彭年逐
工丈明於八年正月十三日開壩放水續因磨莊生

溜旋開直河漕臣又開王市故道兩路並行重運幸
已過濟挑河之後便當築堤無奈時入伏秋錢糧不
敷不能如原題之議上下三百里遙縷二堤一時並
修謹擇緊要舊決之處如呂雲等堡馬路匙頭等灣
酌量興工以防泛溢然黃河之性變遷不定潰決無
時恐日久漸非其故則數萬挑築之力十餘萬金錢
之費無從按工查覈且司廳等官漸次更替後來者
誰能問之水濱而當日在事諸官之功罪亦難懸坐
以服其心且以河臣言河事恐涉虛飾以督錢糧者
算錢糧懼有浮冒臣卽萬萬不敢出此而亦何以自
明哉臣簡往贛凡興大工例遣部堂或科臣勘覈及
今挽黃所挑之河長濶口底俱明所築之堤高厚根
頂俱在乞 皇上俯念陵運重務特遣一官詣工勘
覈施行

謝恩疏

奏爲恭謝天恩事接據邸報兵部一本爲勘覈會勦
流賊功次等事該本部題敘平粵寇諸臣內以臣曾
轉餉資軍列名其間荷蒙聖恩賞臣銀二十兩欽此
臣隨設香案望闕叩頭謝恩外伏念司計籌兵臣子
恪共之常職賞功勸績聖主鼓勵之大權自匪奇庸
何堪懋賞曩者粵賊跳梁荼毒三省 皇上赫然震
怒下令殲勦諸臣同心戮力滅此朝食爰奏蕩平之
烈此實 皇上威靈遐播使文武將吏共效戡定之

力若臣昔佐司農愧持籌之未能近肩治水尚操畚
之罔效方切曠瘼之懼何當賞賚之隆撫膺悚息祇
有勉竭悃誠永矢圖報而已謹具疏稱謝肩任感激
屏營之至

